



5. oktoberi 2016

UKA2016/44/138

Nunarput tamakkerlugu kommunit suleqatigalugit angerlarsimaffeqanngitsunut angerlarsimaffiugallartussanik 100-nik sanaartornissaq qulakkeeriarlugu siunnersuummik aningaasaleeriaatsimik imaqartumik kingusinnerpaamik UKA 2017-imi Naalackersuisut saqqummiussinissaat pillugu Inatsisartuni aalajangiiffisassatut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Utoqqarnut sammititanik siunissami pisortat sanaartortarnissaannut aaqqiissutissamik innersuussisumik Naalackersuisut kingusinnerpaamik UKA 2017-imi nassuiaammik saqqummiussinissaannik peqquneqarnissaannik Inatsisartuni aalajangiiffisassatut siunnersuut.

(Inatsisartunut ilaasortaq Ane Hansen, Inuit Ataqatigiit)

Inatsisartunut ilaasortat Mimi Karlsen aammalu Ane Hansen Inuit ataqatigiit siunnersuuteqarput inissialiornissamik anguniaqartunik, tassalu angerlarsimaffeqanngitsunut 100-nik sanaartornissaq aammalu utoqqarnut sammititanik siunissamat sanaartortarnissanut aaqqiissutissamik Naalackersuisut saqqummiussaqqassasut taakkulu marluk aalajangiiffisassatut siunnersuutit oqaaseqarfigissavagut.

Nunatsinni tamatta assigiimmik pisinnaatitaaffigaarput angerlarsimaffeqarluta ineqartussaanerput, issittumi nunaqarpugut silaannarmi inuuffiusinnaanngitsumi. Ilarpassuagut angerlarsimaffeqanngillat, soorunami tamanna akuerinnarsinnaanngilarput, inuttummi ajornartorsiuterpassuagut ilaatigut pissuteqarput ilaqtariippasuit angerlarsimaffeqannginerisa kinguneranik pissuteqartartut.

Ilaqtariit meerartallit tamarmik angerlarsimaffeqarnissaat qulakkeerneqartariaqarpoq. Ukiuni makkunani misigiuarparput ilaqtariit meerartallit aamma inigisaminnik anisitaasartut tamannalu meeqqanut annertoorujussuarmik inuunerannut sunniuteqapiluttarpoq inuttut innarliinermik kingunerlorujussuuartartunik.

Nunatsinni illoqarnikkut atugassarititaasut sumiikkaluaraanniluunniit pitsaasuunissaat tamatsinnut pingaaruteqartoq oqaatigissavarput, pingaartumik tamatta peqqissuunissarput nunaqarfinniikkutta illoqarfinniikkutaluunniit ineqarnikkut atugassarititaasut pitsaasuusariaqarmata ilaqtariippasuit meeqqat inuusuttut utoqqaallu eqqarsaatigalugit.

Ukiuni makkunani illut pitsaangippallaartut inigitinneqartut amerlavallaarput, illut nutaanngitsut aserfallassimaqalutik ilaatigullu amerlasuut oquttut inigitinneqarput allamik periarfissaqannginnerit pissutigalugit.

Ilaatigummi iniluppallaarneq pissutigalugu nappaatit atugaanerat naammattoorneqartuarpoq, soorlu ukiuni makkunani nappaat sakiilluut suli atugaasorujussuummat.

Tamannalu pissuteqarnerpaajuvoq inilunnermik, illummi amerlassorpassuit suli uffarfeqanngillat perusersartarfeqaratillu tamannalu innuttaasunut peqqinnanngilluinnarpoq.

Taamatut atugassaqartitsinerput soorunami akuersarneqarsinnaanngilaq. Pingaartumik meeqqat utoqqaallu eqqarsaatigalugit.

Naalackersuinikkut suliaqartugut inatsisartuni pissutsit tamakku qaangerniassagutsigit maani inersuarmi peqataasugut tamatta suleqatigiissutigisariaqaripput tassalu tamatta maani innutaaqataasugut angerlarsimaffeqarnissarput, aammalu immikkut illuliornissamut atugassanik amerlanerusunik aningaasaliisariaqartugut Partii Naleqqamiit isumaqarpugut.

Angerlarsimaffeqanngitsunut inissialiornissamik saqqummiussaqrneq isumaqatigilluinnarparput tassami inuppassuit angerlarsimaffeqanngitsut atugaat taamak ilungersunartigisumik atugaqartillugit ingerlaannarsinnaannginnatta ilagut katagarlugit ingerlaannassagaluarutta taava sumut killissaagut? Eqqaamasariaqarparput issittumi nunaqaratta silaannarmi inuuffiusinnaanngitsumi.

Nunatsinni innuttaasunik sannginnerusunik isumaginninnissaq kommunip pisussaaffigigaluarpassulluunniit aamma uagut inatsisartuni akisussaaqataasariaqarpugut inatsisillu sinaakkusiussat ikiuisinnaanerput ajornartippagu taava inatsisitigit allannguutissamik siunnersuorsiornissaapput Naalackersuisut ilagummi qimannagit ineriartornermut ilaatittariaqarpagut tamannalu Naalackersuisuni pisussaaffittut tigusariaqartoq Partii Naleqqamiit oqaatigerusupparput.

Taamaattumik siunnersuut angerlarsimaffeqanngitsunut inissialiornissaq tamakkiisumik tapersorsorparput.

Utoqqarnut inissialiornissamik siunnersuut aamma peqataaffigerusupparput makku pissutigalugit.

Ungasinngitsukkut nutaarsiassani takuarput utoqqaat ilaata inissiarsuarni najugaat takutinneqartoq. Ukiorpassuarni najorsimavaat akilersortuarlugu imak ajorsilluinnarsimatigaaq igalavi allarutinik simissorlugit uffarfia oqummik ulikkaartoq.

Tassuunaannarluunniit takusinnaavarput utoqqartatta ineqarnikkut atugaat qanoq ilaatigut ajorluinnartigisut taamaattumik siunissamut utoqqartatta ineqarnikkut pitsaasumik atugassaqarfiunissaanik pilersaarusiornissaq kommunit peqatigalugit ingerlattariaqartoq.

Siunissami qujanartumik atugarissaarnerulluta qangamut naleqqiullugu inuunertusiartornerput utoqqaat amerlanerulerneranik kinuneqartoq nuannaarutigaarput.

Inuiaat utoqqartallit siunissamut nukissaqarnerusarput, ukiunilu makkunani inuttut ajornartorsiuterpasugut annikillisarneqassappata utoqqartatta ullumikkornit atugarissaarnerullutik inuuniarnikkut atugaqarnissaat pisussaaffigalugu ingerlattariaqarparput, tarnikkummi anersaakkullu nukittunerulissagutta utoqartagut pinngitsoorsinnaannginatsigit.

Utoqqaammi pinngitsoorsinnaanngilagut siunissami meeqqat inuusuttullu tarnikkut nukittuut pilersinneqassappata utoqartatta atugarissaarnissaat ataatsimoorullugu

sulissutigisariaqarparput taakkumi siunissamut nukinnik tunniussassaat
pinngitsoorsinnaannginatsigit.

Utoqartatta pitsaasumik angerlarsimaffeqarnissaannut pilersaarusiornissat kommunit
peqatigalugit ingerlattariaqarpagut tassami siunissamut utoqqarnut atugassarititaasunut
ineqarnermullu tunngasunik sillimmartaanngikkutta ilungersunartumut killissinnaagatta.

Taamaattumik siunnersuut tamakkiisumik taperserlugu ataatsimiititaliami susassaqartumi
suliarineqarnissaa innersuussutigaarput.

Hans Enoksen